

江西詩徵

江西詩徵卷八

南城曾煥賓谷編輯

宋

李觀

觀字泰伯南城人皇祐初以薦試太學助教終海門主簿太學說書有退居類稿

竹齋題事

低齋結空野小竹移孤林
齋閒竹淨好日媚幽人心
南方夏朕暑獨此畱殘陰
夏雨挫促夢穿風搜涼襟
長茵展麗蘇亂歌奏歡禽
待奴裹村服語客拋塵簪
志高成利讎思爽生詩淫
值聖喜盈卷感古悲人琴
山迎穩履遠月動澄

杯深榮名雖未染幸亦非堙沈

遠山

最能牽病眼天際一山橫盡日是秋色無人知地名暗時
雲自合決處路應平才子霑衣淚千秋共此情

客有話故丁祕監京師舊宅因而傷之

等閑榮謝已愁聞況話三公極寵身青史尚爲今世事朱
門不是舊時人文章散入諸蕃口花藥畱添上國春生死
交情渾易見有誰過此爲霑巾

絕句

人言落日是天涯望極天涯不見家已恨碧山相掩映碧
山還被暮雲遮

清明

遲遲日影坐成曛
聞說清明在此晨
花卉不宜愁眼看
句萌能爲幾人春
銷磨志氣多因老
檢點交遊半作塵
欲向醉中聊自適
病來還厭舉杯頻

王方平

五百餘年別恨多
東征重得見青蛾
攄麟始擬窮歡樂
不奈閑人背癢何

壁月

壁月迢迢出暮山
素娥心事問應難
世閒最解悲圓缺
祇有方諸淚不乾

梁帝

凝旒南面總虛名
廟祀何曾暫割牲
但學禪心能忍辱
莫羞侯景陷臺城

送僧遊廬山

行非爲客住非家
此去廬山況不遐
要見南朝舊人物
池中唯有白蓮花

憶錢塘江

當年乘醉舉歸帆
隱隱前山日半銜
好是滿江涵返照
水仙齊著淡紅衫

望海亭席上作

七閩山水掌中窺
乘興登臨到落暉
誰在畫簾沽酒處
幾多鳴櫓趁潮歸
晴來海色依稀見
醉後鄉心積漸微
山鳥

不知紅粉樂一聲檀板便驚飛

秦人峯

秦法雖甚苛秦吏若猶拙山林不數里俾爾逃得脫予觀
後世事政役火烈烈苟非爲鬼神何計避羈紲聖皇今在
御百事咸均節常披詔書意苦念生財竭誰能將順者所
望在賢哲無使峯中人笑我民屠裂

寄祖祕丞

我本山田人好尙與衆異平生重交遊所得固無幾昨者
應茂才西行覲朝美時當慶歷初選舉實多士茫茫帝王
州棲棲遠行子攜錢賃破屋乞火蒸陳米鞍馬到卽賣僮
僕癡難使有時造公卿努力向廛市數步則一歇長吁乃

能起衣冠信質野言語欠婉媚聞人顧之笑將命見而避
往往得所請蹒跚向前跪何能剖懷抱浪自慕尊貴貴人
如天神喘息生雲氣野夫等麋鹿芻豢非所冀歸來坐空
窗惆悵夕不睡塵埃滿鬚鬢臭惡入口鼻業已辭我親中
道豈可廢僂僂待報聞愁憂遂經歲二年正月晦閑房適
假寐有奴來啄門手披擇之刺承命驚下牀赤腳誤穿履
從來未識面只是聞高第名顯宦且達見我當何爲再拜
就請席熟視知可畏昂昂貌甚古崖石掀氛翳渾渾氣甚
和璞玉無芒銳高談貫先哲雅意在茲世昔人相遇間一
言猶合契今吾於擇之寧假再三計自此習往還中心蔑
疑貳如熱息廣廈如飢享盛饌君授南康守舟維蔡河浹

我館汴之陰前去路則邇時時結帽帶踽踽尋英眺衆人
嬌綺羅相對綢繭正朱絃自三歎笑殺彼鄭衛王命有則
日都門一反袂君行劇鴻軒我處近匏繫曠日及孟秋皇
慈始收試崇崇九門開竊竊三館秘主司隔簾帷欲望不
可跂中貴當根闌蒐索徧靴底呼名授之坐敗席鋪冷地
健兒直我前武怒足防備少小學賢能謂可當賓禮一朝
在檻穽兩目但矐眙捉筆析所問移時數千字讀書取大
者纖悉或靡記炙背雖自奇寧當至尊意龍馬騰天衢鴛
駝含羞死量才與揣命坦蕩更何事振衣託歸舟河流迅
弧矢淮清江且平踰月在枕几及過廬山南聞君初布泊
船檣旣入岸馬首已來暨迎我到府署相見共欣喜嫩橘

摘干苞肥魚斫干尾蕭晨徹骨清佳境邀人醉高會雖暫
歡故園當速至草草成別愁悠悠渡湖水是時東方曙俄
然北風厲陽鳥畏威逃江神以儒戲氣象斗不同波濤大
可憐長帆張欲裂孤舟蕩無倚或從玉井出或自銀山墜
篙工斂手立脈脈無窮淚從者閉目坐嗟嗟不敢視我時
撫牀歌分作長江鬼所恨生劬勞不孝而已矣禍福果無
妄險難行可弭脫身得平康引領望鄉里厥後過挾日幸
得見維梓入門何怡怡饌具有甘旨稚女能紉鍼驕兒徧
生齒芟除閑草萊疏通舊沼沚吾廬可終焉生計由此始
郡守方仁賢學宮盛修理踵門致勤恪命我論經藝麻衣
何紛紛鄉人子若弟不唯務章句所欲興禮義施爲有本

未動靜有綱紀蚤與雞同覺夜與月相值孳孳忘飲食齏
齏在文史時附南康書或逢北來使尺素雖滿前語言難
到耳殆及三年冬聞君受朝寄名稱按刑獄勢可平冤滯
故人漸大任賤子羞自慰軒車日已遠翰墨益難致薄命
良可傷降災渾未已是年之季冬舉家纏疫癘老母尙委
頓微軀蓋螻蟻形骸非我有魂魄與心離權柄在鬼物功
力非服餌曉突誰能炊午關猶未啟荏苒再週月幸會天
不棄春風動枯槁甘雨澆根底行行夏交秋吉徵固不替
高堂何戚戚疾病日攢萃一夕脾臟間發泄不復止詰朝
問無言目瞋口齒閉號呶諸兒孫雜沓大鼎沸嗟哉當彼
時誠恐弗可諱醫師相急熱巫覡兩經緯藥草極酸辛法

術彈怪詭薄暮乃復蘇踰旬僅知味方茲戀庭闈旋已對
獄吏試言其所由內省亦無媿有人同州間發迹自徒隸
竊被儒衣裳曾忤小材技突如遊京邑欲以干明獻朝家
焉可欺羈旅謀自濟乃造黃紙書便取青袍衣乘船歸南
方斂板謁當位自言章奏奇因藉宦官勢詔文降自中宰
府不預議卽云能占天且曰善興利江淮一經過郡府十
不啻到處爭逢迎莫能思處置轉運苦愛奇得之如國器
故使按坑冶庶可展才智小人靡忖度假寵愈放肆行符
索吏卒圈印發傳遞閭閻望塵拜州縣從風靡遮道結繒
綵鋪筵塞珠翠車騎前後呵給使數百指何者爲典刑獨
自誇爪背在昔秦無人繞朝贈之箠繫我非韓瞽碌碌寧

不恥作書貽諫官姦詐患不細有詔令逮捕按驗取真偽
是夫知計窮誣我以罪戾上官猶眩惑準例皆拘繫幽幽
罔狎中憤憤爭競裏周旋二十日乃克見巧敝盡地尙不
入叢棘曷可冀惟茲謝吾母幾不全髮體教道亦難行凡
庸豈同志吁哉養英才徒以釣積毀篋書歸敝廬庠門任
蕪穢去年仲夏後盛暑若火熾郊園有餘爽蔬果聊可嗜
時復觀田疇畢力奉耘耔人生但飽暖此外皆淫侈思君
非一日欲去無雙翅俄聞遷黃州又說丁喪制古來聖與
賢誰不遭醜詆蜀日駭狗犬夏鼎愁魑魅人壽有短長孝
子謾憂思滅性經所貶節哀禮爲是矧夫王佐才簡在唐
虞際揚名以顯親報德豈不遹加飯苟如願蒼生猶有恃

適時匪我長不朽乃所擬道義果弗充富貴反爲累回憲
本無官桀紂焉得此俗子但相非吾心已居易近者猶葛
陂念君在裘臬作詩布幽懷讀之勿嗤鄙

女色無定美贈卿才

女色無定美寵至美則多士才無定稱用顯稱已過長安
小家子粲粲秋池荷性慧不覺恥母憐不加訶出戶一囊
磨見人雙眼波情動笑難止語嬌音屢訛都人口如沸觀
者踵相摩因緣幸充選恩澤成偏頗少費萬金珠一呼千
綺羅伴愁慘白日猛睡傾天河東鄰有賢女春綠涵修蛾
花豔不裁翦玉光無切磋自小固聞禮藏頭豈知他親戚
尙未見媒官當奈何過時誰訪問生世就蹉跎豈不有配

偶市里或山阿豈不有奉養春饌與機梭列女不得傳樂
府無人歌容華日衰落涕泣坐滂沱富貴易修飾貧賤多
笑呵柳下無仲尼小官終滅磨進退在勇決遲疑兩皆蹉
退當事奇偉夙駕追雄軻進當取勢位健筆爲干戈胡然
守一節獨自埋隨和

弋陽縣學北堂見夾竹桃花有感而書

暖碧覆晴殷依依近朱欄異類偶相合勁節何能安同時
盡妖豔無地容檀欒移根旣不可潔心誠爲難外貌任春
色中心期歲寒正聲尙可聽誰是伶倫官

聞女子瘡疾偶書二十四韻寄示

昨日家人來言汝苦寒熱想由卑濕地頗失飲食節脾官

驕不治氣馬癡如綫乃致四體煩故當雙日發江南此疾
多理不憂顛越顧汝僅毀齒何力禁喘噎寄書詰醫師有
藥且嚼噉方經固靈應病根終翦滅但恐崇所爲嘗聞理
中說茲地有罔兩乘時相習結嗟哉鬼無知何如我爲孽
我本重修飾胷中掬冰雪禍淫雖甚苛無所可挑抉疑是
饕餮魂私求盤碗設盡室唯琴書何路致輩血無錢顧越
巫刀劒百斬決徒恣彼昏邪公然敢抄撮吾聞上帝靈網
目匪疎缺行當悉追捕汝苦旦夕歇慈愛早有加憶念今
逾切塵勞差可畏歸計又云輟所生能助勞祖母矧聰哲
羸臥縱未蘇撫視諒非拙勉勉多自安風來信勿絕

閔雨詩

吳江之南是曰豐國五種之生天下食一歲不登吾民菜
色如何天不仁縱彼旱孽稱其神矯矯赤龍推火軒來自
東南山咸池悞水不敢沃陽侯失色愁烹煎况茲猷猷流
涓涓何足吸之脣齒間但見禾與黍蓬勃紅塵起土伯勑
其屬掃路迎飢鬼哀哉氓蚩蚩託身釜鬲惟蒸炊小人怨
咨君子知天生天殺今其時我聞皇穹大德在生育愛養
萬物同嬰兒產民之身賦民食中道絕之何所爲當時冥
冥間委任非其宜山川之神各守土羣龍受位司天池上
帝當軒親戒勅十日一雨無愆期帝心仁且信臨下固不
疑謂言庶事有分職屏去視聽思無爲安知愚下鬼負德
孤恩難制指弄天之權侮人命貪嗜牛羊邀祭祀忽焉一

物不稱情因教此旱災生靈雷霆之官畏罪莫敢諫頭枕
天鼓眠不醒帝在紫微垣下隔千里雲徒勞銜恤向空哭
帝心雖聖安得聞北斗侍帝側幹運氣母均四時五星暨
衆宿照曜亡偏私夫何容此鬼恣行胷臆輕天威定是機
務繁耳目有所遺小臣亦何者草莽負奇節欲係神頸無
長繩欲斬龍頭劒鋒缺皇穹如未察凶邪空使小臣心鬱
結

甘露亭詩

乾坤父母莫匪慈胚胎億兆成角羈其間哺乳不及處有
時泣殺呱呱兒南川上游號沃野景祐丙子嘗凶飢新田
始苗舊穀罄十室八九無晨炊伏陰何者不仁甚釀作水

災來助之煙煤刷天雨汁黑嘔山泄谷爭奔馳橫流一夜
打城郭萬弩竊發穿毛皮東隅有洲尸揖揖如蟻欲走遭
水圍屋根無力樹腰折蛟蜃食人猶擇肥波濤一望萬山
阻六親不得相扶持國子劉公好仁者惟時假守茲軍麾
民生在我不在命告舟往救無敢違童兒赤立婦女困載
之刳木何纍纍泥沙外冷內飢渴口噤不語如狂癡牽攀
坐臥滿府舍賦以酒飲加餽糜隨流往往亦不死遠在百
里無人知捐金購得問姓氏名使親族攜之歸司農倉廩
盡發出待奏報先施爲有餘況可補不足大賈蓄家如
響隨來瞻去察夜繼晝赤熱不忍蔭華懷由斯一郡十萬
戶餓膚日月生膏脂存者相保沒者葬唐虞仁壽重毆躋

聖主養賢賢養物氣和郁郁通高卑城西老宮古松徑一朝墜露甘如飴千柯萬葉結不解玉階瓊樹光離離吐俗奔走競觀觀手攀口吮同齋舍學老之人周氏子好善不類黃冠師欲令事迹絢久遠築亭其地高巍巍公之歸朝不可借松樹至今猶未衰我作此詩揭亭子他年墮淚如羊碑

春社詞

並序

寶元二年嘗夢大雨震所居室驚而仆地既已有一人甚長大紫衣而冠意謂雷之神也呼觀使前授之題曰春社詞觀懼栗栗援筆得八句與之及覺尙記其首三句頗怪麗今七年矣值暇日以五

句足之

吳臺翫春鎖春色雨刷花光入龍國田邊大樹啼老鴉野
雲癡醉寒查牙年華欲住風雷惡蘭臉知秋淚先落時榮
時謝無了時扶起混沌須神醫

曉角

腸斷城頭盡角聲燈青月黑酒微醒濃香夢裏誰曾管只
有離人夜夜聽

送春寄呈祖袁州

去年春盡在宜春醉送東風淚滿巾今日春歸倍惆悵相
逢不是去年人

暮春始遊城西

病多無力逐紛華三月衡門未見花長恐後期成索寞果
逢殘景獨咨嗟闌干倚望山空在杯酒遲留日易斜謾說
明年更春色不知園囿屬誰家

秋晚悲懷

漸老多憂百事忙天寒日短更心傷數分紅色上黃葉一
瞬曙光成夕陽春水別來應到海小松生命合禁霜壺中
若逢仙翁去待看年華幾許長

書懷寄介夫

棄材幸免雜興薪收拾緇衣出洛塵漸老得閑纔是性謾
言成謔且隨人能傳身後須文字要識胸中只鬼神俗子
不勞輕毀譽問天長乞醉鄉春

鳴蜩

雨餘雲漏日蝨思已喧喧時節驚初夏聲音似故園爲誰
吟綠野相共送黃昏便是秋來信霜髯更幾根

自解

人生何苦要多才百慮攢心摘不開夜月幾曾無夢處春
風只管送愁來禿毫強會悠悠事浮世無過滿滿盃看取
秦坑煙焰裏是非同作一坏灰

不寐

四壁空空絕語聲困來終是睡難成孤燈要與人相背寒
漏苦教天不明累月故園無信息幾般閑事惱心情別愁
若解生華髮一夕應添一萬莖

曾鞏

鞏字子固南豐人易占長子嘉祐二年進士調太平州司法參軍召爲集賢校理出知福明等州神宗朝加史館修撰中書舍人卒有元豐類稿續稿外集

麻姑山送南城尉羅君

麻姑之路摩青天蒼苔白石松風寒峭壁直上無攀援懸磴十步九屈盤上有錦繡百頃之平田山中遺民耕紫烟又有白玉萬仞之飛泉噴崖直瀉蛟龍淵豐堂廣殿何言言階腳插入斗牛閒樛枝古木不計年空嗟枵然臥道邊幽花自嬋娟林深爲誰妍但見塵銷境靜翔白鶴吟清猿

離禽乳鹿往往噪荒巔卻視來徑如緣緗千重萬疊窮巖
巒下有荊吳粟粒之羣山又有甌閩一髮之平川爽基縱
橫遠近有菽麥魚鱗參差高下分岡原千奇萬異可意得
筆墨禿盡誰能傳丈夫舒卷要宏達世路俯仰多拘牽偶
來到此醒心目便足洗耳辭囂喧羅夫子一日遠補東南
官愛此層崖峻壑之秀發開軒把酒可縱觀喜此披霧插
漢之負起出門舉足得往還羅夫子一尉東南方屈盤此
邦之人衣食足問境年年桴鼓閑几案剗裁得休暇山水
登躡遺紛煩我行送之思故國引領南望心常懸

金山寺

塵外岩巖鷲嶺宮架虛排險出青紅林光巧轉滄波上海

色遙涵白日東夜靜神龍聽呪食秋涼蒼鶻起搏風連荆
控蜀長江水盡在迴廊顧盼中

錢塘上元夜祥符寺陪咨臣郎中文燕席

月明如畫露華濃錦帳名郎笑語同金地夜寒消美酒玉
人春困倚東風紅雲燈火浮滄海碧水樓臺浸遠空白髮
蹉跎歡意少強顏猶入少年叢

鮑山

雲中一點鮑山青東望能令兩眼明若道人心似矛戟山
中那得叔牙城

聖壽院昌山主靜軒

一峰瀟灑背城陰碧瓦新堂地布金花落禪衣松砌冷日

臨經帙紙窗深幽棲鳥得林中樂燕坐人存世外心應是
白蓮香火社不妨籃輦客追尋

凝香齋

每覺西齋景最幽不知官是古諸侯一尊風月身無事千
里耕桑歲有秋雲水醒心鳴好鳥玉砂清耳漱寒流沈心
細細繡黃卷疑在香爐最上頭

多景樓

欲收嘉景此樓中倚徙闌干四望通雲亂水光浮紫翠天
含山氣入青紅一川鐘唄淮南月萬里帆檣海外風老去
衣襟塵土在祇將心目羨冥鴻

金線泉

玉甃常浮潁氣鮮金絲不定路南泉雲依美藻爭成縷月
照寒溪巧上弦已繞渚花紅灼灼更縈沙竹翠娟娟無風
到底塵埃盡界破冰綃一片天

露松

園林初日靜無風霧松開花處處同記得集英深殿裏舞
人齊插玉瓏鬆

北歸

江海多年似轉蓬白頭歸拜未央宮堵牆學士爭相問何
處塵埃瘦老翁

將行陪貳車觀燈

行歌紅粉滿城歡猶作常時五馬看忽憶使君身是客一

時揮淚逐金鞍

赴齊州

淮南蒙召鬢毛斑
乞得東秦慰病顏
曉整輕鞍汶陽北
卻衝微雨看青山

一鶚

北風萬里開蓬蒿
山水洶洶鳴波濤
常聞一鶚今始見
眼駛骨緊精神豪
天昏雪密飛轉疾
暮畧東海朝臨洮
社中神狐倏閃內
腦尾分磔垂弓櫜
巧兔獐雞失草木
勇鷲一下崩其毛
窟穴呦呦哭九子
帳前活送雙青猱
啾啾燕雀誰爾數
駭散亦自亡其曹
勢疑空山竭九澤
殺氣已應太白高
歸來礪菟載俎豆
快飲百甕行春醪
酒酣始聞壯士

歎丈夫試用何時遭

寄孫之翰

孫侯腹載天下書崔嵬豈啻重百車伏羲以來可悉數孰
若自作有何餘更能議論恣傾倒萬里一瀉崑崙渠誰爲
胸中幹太極元氣浩浩隨卷舒昔來諫官對天子何穢不
欲親芟鋤不容乃獨見磊落出走竝海飄長裾孫侯風節
何所似雪洗八荒看太虛親如國忠眼不顧舊若張禹手
所除歸來已絕褒貶筆進用祇調敷倉儲合持讀書白虎
論更護日月金華居萬世根深固社稷百年舊叟休田間
素識孤生愛茅屋久將老母求山租秋歸願事九江蘓夜
出未捲安豐漁孔明苟欲性命遂孟子豈病王公疎塵埃

未得見此樂太息一付西江魚

寄舍弟

新霖洗窮臘東南始知寒驚我千里意覺汝征途難空江
挂風席扁舟與誰安羈旅費亦久橐衣豈無單念汝西北
去壯心始桓桓竟逢有司惑斥走懷琅玕士固有大意秋
毫豈能干所憂道里困久無一罇歡我意生惻惻爲之却
朝餐人生飄零內何處懷抱寬已期採芝樂握手青霞端
無令及門喜淹留雪霜殘

送徐竑著作知康州

溪蠻昔負命殺氣凌南州城郭漲烟火堂皇嘯蜉蝣被髮
盡冠中吾人反縲囚行剽至杪忽歸載越山邱驅攘事雖

定收合信瘡痍不有異澤霑何令餘患瘳寒風在林鳴君
馬不能留初佩太守章慨然任人憂問俗灰燼餘咄咄令
心謀士材爲世用因難乃知尤煩苛一蕩滌幽遠徧懷柔
四封鳴雞犬五谷被原疇里閭多娛宴歌鼓震溟陬明義
每所希古人不難侔日月有常運志士無安輟山川自茲
始努力千里遊

詠雪

北風蕭蕭鳴且歇短日悠悠生復滅朝含滄海滿天雲暮
斷行人千里雪初通壑谷氣先冷漸蔽郊原路疑絕併包
華夷德豈薄改造乾坤事尤譎驅除已與塵滓隔濯漑終
令枯槁悅相持始信竹柏勁易敗可嗟荏葦折垂條巧綴

如自愛智井隨形呀且缺飛檐轆轤駕長浪巨壁林林倚
精鐵弊衣或有肝猶凍荒宴誰能耳偏熱壯夫撫劍生銳
氣志士杜門養高節已開襟胸絕煩憤更足潯勝慰空竭
雖無酒醴發嘲笑亦有詩謠恣按挾新陽髣髴送鏡鑒舊
徑參差分曲折留當屐齒印崖石徙倚長松看寥泐

靖安縣幽谷亭

橫江捨輕楫對面見青山行盡車馬塵豁見水石寰地氣
方以潔崖聲落潯潯雖爲千家縣正在清華間風煙凜人
心世慮自可刪况無訟訴驚得有觴詠閒常疑此中吏白
首豈思還人情貴公卿燿燿就玉班光華雖一時憂悸或
滿顏雞鳴已爭馳驂駟振鑣鑲豈如此中吏日高未開關

一不謹所守名聲別妖奸豈如此中吏一官老無瘕瘕悒悒
謀謨消汨汨氣象孱豈如此中吏明心懾強頑況云此中
居一亭衆峯環崖聲夢猶聞谷秀坐可攀倚天巉巖姿青
蒼雲嫋嫋對之精神恬可謝世網艱人生慕虛榮斂收意
常慳誠思此憂愉自應喜榛菅

青雲亭閒望

一登此亭高且脫藩廡擁開顏廣軒闢吹面驚飈動城回
石崖抱山亂寒潮湧谷草晚更芳沙泉細猶湧崢嶸四封
壯縹緲佳氣捧連天廣衢走拂日長簷聳區區射聲利浩
浩奔蹄踵趨營衆所便冒涉吾久恐緬想山水宅環觀松
檜拱屬耳天籟樂脫身人事冗幽閒味雖薄放蕩愆所勇

窮凶勢猶競殺伐聲更訥揚揚斂臣貴熒熒官兵寵諒知
草茅微無補社稷重放牧手幽鞭畊鋤躬瘦隴尙或此心
諧豈云吾道壅

寄子進弟

憶子去家日南風始吹衣今來日未幾蠅蚊已羣飛思子
兼晝夜何啻如渴飢喜聞遠客至手自排荆扉客送書一
紙翰墨予所揮上言山居惡夢寐接庭闈次言服畎畝禾
黍穰以肥其餘業文字頗測幽與微題詩在紙尾語老意
不非我喜何所似大似客得歸我與子事親未飽藿與藟
常苦去左右辛勤治鞍轡子行何時反我眼日已晞應須
畢秋刈相見慟依依

詠史

京室天下歸飛甍無餘地國士憂社稷塗人養聲利貴賤競一時我冠各鱗次子龍獨幽遠聘召漠無意子雲無由歸俛首天祿閣君平獨西南抗顏觀寥廓無猜到沉冥有故驚寂寞用心豈必殊拘肆事終各

將之浙江延祖子山師柔會別飲散獨宿空亭遂書懷別

蜀客向何處欲觀浙江潮擬舟吳門柵况會故人招置酒吳亭上無人吹紫簫浩觀萬物變颯爾生涼飈遂恐時節晚芳蘭從此凋功名竟安在富貴空寥寥鴻鵠舉千里鸞鳳翔九霄胡爲蓬蒿下日夜悲鷦鷯車馬夕已還行人亦

飄飄浩然滄海志寂寞守空宵

初夏有感

我從得病臥閭巷三見夏物爭滋榮紅英紫萼逐風盡高
幹密葉還陰成山亭水館處處好朱碧萬寶相駢擎林鳥
梁燕各生子翅羽已足爭飛騰雉雞五色繡新翮鷺鷥慕
匹相隨鳴穴蜂露蛭亦有類歛往復聚何翺輕箔蠶滿室
事方盛繭綴上下如連星麥芒秋穎錯雜出高壠大澤填
黃青物從草木及春鳥無一不自盈其情嗟哉獨病不如
彼胸氣臥立常怵怵筋酸骨楚頭目眩強食豈得肌膚盈
我身今雖落衆後我志素欲希軻卿十年萬事常坎壈奔
走未足供藜羹愁勤未老鬢先白多學只自爲身兵自然

感疾憊形體後日雖復應伶俜非同世俗顧顏色所慕少
壯成功名但令命在尙可勉屑細詎足傷吾平

送叔延判官

北風吹空雪花冷平鋪雲濤冒峰頂江長水濶飛鳥絕沙
樹參差動波影君子從戎碧油下綠髮青瞳笏袍整大馬
高車府中罷一船沿流背丁丙魴魚勝銀尊酒美物色當
前若圖屏危帆健櫓醉中去千里奔過猶一頃明年隨春
到京國紅紫燒空折桃杏獻書又謁蓬萊官新斲豪曹試
鋒穎况遇朝廷方急材驥駉駉足當騁

舍弟南源刈稻

買田南山下禾黍忽已秋糟牀待此注豈止衣食謀窮陰

廻霜霰不可遲擊收吾黨二三子晨行已寒裘久若藏中
器至山諒優遊况已除險穢新堂置崑幽窗軒衆峰山階
墀水淙流良材未成種草樹亦已稠寒花開照耀谷鳥樂
唼嗽心與珍境接佳興固已適而况饋朝夕甘美日可搜
黃雞肥落俎清沽湛盈甌時鮮鱸冰鯽餘滋折丹榴此味
何以作文辭頗賡酬晝務誠遺滯夜工督春揄因觀稼穡
勞始覺奉養優此樂詎非幸人生復何求送子固自起往
意不可留

瑯琊泉石篆

陽冰絕藝天下稱瑯琊石篆新有名初留泉涯俗誰顧一
日貴重繇先生古今書法不可數猶有字本存於經我於

八體未曾學雖得此字寧能評高文老筆又所愛欲敘髣髴辭非精筆端應驅鬼神聚筆妙復與陰陽爭刻雕萬象出冥昧不見刀斧曾經營奇形挺若聳崖巘險勢直恐生風霆雨來莽蒼龍蛟起秋入寥泐星斗明先生七言載其側爲地自與邱山平先生抱材置荒郡有若此字存崑扁當還先生坐廊廟悉引萬事歸繩衡遂收此字入秘府不使日灼蕒苔繁高材重寶不失一唐舜湯禹寧非朋

幽谷曉飲

先生卓難攀材真帝王佐皎皎衆所病蜿蜿龍方臥卷被天下惠赴此一郡課幕府旣多暇山水乃屢過旌旗抑蒙密車馬經坎坷愛此谷中泉聲響遠已播槎橫勢逾急雨

點綠新破旁生竹相圓竦竦碧千个遙源宿難窺盤石坦
如磋遊鱗戢可數飛鳥嚶相和援琴薰風後結字寒崑左
觥筵已得月金紈尙圍坐心如合逍遙語不綴招些一時
聳傳觀千載激柔懦甘棠詩之懷峴首淚嘗墮況此盛德
下襦袴人所荷不假碑刻垂棟牖敢隳挫當今甲兵後天
地合輶軻先生席上珍豈忍溝中餓毋徐黑轡召當馳四
方賀

代書寄趙宏

憶承昨歲致書召遂入江城同一笑羸奴小馬君所借出
犯朝寒鞅頻掉從來萬事固已拙況乃病歎顏不少去隨
衆後已自枉更苦世情非可料一心耿耿浪誠直百口幡

幡競訶訥獨君踴躍於我顧譬于真玉火空燒別來未幾
歲云換楊柳得春還窈窕東溪最好水已淥桃李萬株紅
白照當時疾臥不能出日倚東風想同調逡巡紅白委地
休新葉可書陰可釣君持使傳入南師忽領貔貅過蓬藿
僧堂取酒就君飲不覺乘歡盞頻酌屋西明月過簾白簾
角有時飛熠熠明聞鉦鼓催軍發共上高樓看旗旄日高
行忽又別君從此閉門誰可嘯秋風已盡始得書喜聽車
輪返窮微身欲追隨病未能目斷珊瑚遮海嶠是時肺氣
壯更惡日以沉冥憂不療豈其艱苦天所憫晚節幸值巫
彭妙放心已保性命在握手猶驚骨骸峭今年霜霰雖未
重室冷尙無薪可燎一畝酸寒豈易言局促不殊魚在罟

勞君書札數問訊深愧薄材無象竹君心卓犖衆未識安
得辨口聞廊廟

庭木

庭中有佳樹清影四面垂往往風雨夜蛟龍此投依留之
待鸞鳳未許燕雀窺誰謂烏鳥惡安巢最高枝不顧白日
照直傍陰虹飛自恃棲託穩豈憂彈射危三春獨翱翔百
鳥斂羽儀鳳凰不能爭況乃鳬雁微旣務志意得都爲世
可欺白晝攫鼎肉從容擇牲犧近人不肯避一怒終夜啼
遭其瞰牆屋禍患豈可移聽之欲占赦婦女固已癡忿害
乃其所何肯報福釐行路指之歎童稚爭罵譏鸚鵡獻至
尊言語固可奇翡翠輪太府器服所取資雉雞美文章贊

江表言集 卷八
贈理亦宜應鸛逐惡鳥天威得施爲關雎於周室耿潔配
后妃莫如此鳥頑飽食無所裨一善不能有醜聲日交馳
但知擇嘉處巍然治其棲衆怒未易忽微幸亦有斯安知
無刀斧崩分棄毛皮且勿引蠹蟲使樹心本披亦有愛搏
擊鉤連泉與鷗亦勿樂順已窟穴藏狐狸凡能致大患甚
不自豪豈未知引避去此語足自規惜哉種樹意長與事
乖違古來亦如此壯士徒嗟悲

湘寇

衡湘有寇未誅剪殺氣凜凜圍江潯北兵居南匪便習若
以大舶乘高岑僉人操兵快如鶻千百其旅巢深林超突
溪崖出又伏勢變不易施戈鐔能者張弓入城都連邑累

鎖遭驅侵羣黨爭誇殺吏士白骨棄塋誰棺衾豺豺數萬
直何用日費空已逾千金楚爲貧鄉乃其素應此調發寧
能禁捷如馬援不得志强曳兩足登嶽峯鳥蟻睢眈倚崑
險此慮難勝端非今較然大體著方冊唯用守長懷其心
祝良張僑乃真選李瑒道古徒爲擒嗚呼廟堂不慎擇彼
士隴隴何能任大中咸通乃商鑒養以歲月其憂深願書
此語致太史獻之以補丹扃箴

地動

吾聞元氣判爲二升降相輔非相傷今者無端越疆畔陰
氣焰焰侵於陽陽收剛明避其勢陰負捷勝尤倡佯地乘
是氣亢於下震盪裂拆乖其常齊秦晉代及荆楚千百其

堵崩連牆隆邱桀屋不自定翩若猛吹搖旌幢生民洶洶
避無所如寄厥命於湖江有聲四出嘻可怕誰擊萬鼓何
雷碩陰爲氣靜乃如此天意味密寧能詳或云蠻夷尙侵
軼已事豈必垂災祥意者邪臣有專恣氣象翁翁難爲當
據經若此非臆決皎如秋日浮清霜祖宗威靈陛下聖安
得直語聞明堂朝廷肅穆法度治豈用懔懔憂胡羌

追租

耕耘筋力苦收刈田野樂鄉鄰約來往樽酒追酬酢生涯
給俯仰公斂忘厚薄胡爲此歲暮老少顏色惡國用有緩
急時議費量度內外奔氣勢上下窮割剝今歲九夏旱赤
日萬里灼陂湖蹙埃壚禾黍死磽确衆期必見省理在非

可畧謂須倒廩賑詎止追租閣吾人已迫切此望亦迂邈
奈何呻吟訴卒受鞭撻却寧論救憔悴反與爭合僉問胡
應驅迫久已懼匱涸計須賣強壯勢不存尪弱去歲已如
此愁呼徧郊郭飢羸乞分寸斯須死笞縛法令尙修明此
理可驚愕公卿飽天祿耳目知民瘼忍令瘡痍內每肆誅
求虐但憂值空虛寧無挺犂鑿暴吏理宜除浮費義可削
吾臥避囂喧茲言偶斟酌試起望遺村霾風振墟落

路中對月

山川困遊人而不斷歸夢其餘惟日月朝夕南北共日光
驅人身擾擾遂羣動鄉思須暫忘世事那止重豈如月可
喜露坐息倥傯清明入襟懷萬里絕纖霧愛之不能餐但

以目睛送想知吾在廬皎皎上修棟慈親坐高堂切切兒
女衆憐其到吾前不使降帷幪豈不映時節荏苒更季仲
而我去方急其能計歸程我非土木爲耳目異龔曹念之
曷由安腸胃百憂中何言月可喜喜意亦有用爲其同此
時水木光可弄猶勝夢中事記之聊一誦

漢陽泊舟

暫泊漢陽岸不登黃鶴樓江含岷岷氣萬里正東流驚風
孤雁起蔽日寒雲浮祇役雖遠道放懷成薄遊興隨滄州
發事等漁樵幽煙波一尊酒盡室載扁舟

遣興

青燈闌鼠窺寒硯落月啼烏送迴笳江漢置身貧作客溪

山合眼夢還家百憂忽忽丹心破萬事悠悠兩鬢華誰與
健帆先度鳥更無留滯向天涯

秋日感事示介甫

秋日氣已盛陰蟲朝暮聲煙雲斷溪樹風雨入山城沙磧
有遺戍旌旗多遠行生民苦未息吾黨恥論兵

曾布

布字子宣南豐人羣弟嘉祐二年進士除崇政殿
說書累官同知樞密院事徽宗卽位以定策功拜
尙書右僕射旋坐黨籍遭貶竄復提舉嵩山崇福
宮卒贈觀文殿大學士諡文肅

表海亭

江門前集 卷八 三
表海風流舊所聞青冥飛觀一番新山河十二名空在簪
履三千迹已陳極目煙嵐九霄近滿州樓閣萬家春出來
興廢南柯夢且喜登臨屬後人

布作高陽臺衆樂園成被命與金陵易地兄弟待罪
侍從對更方面實爲私門之慶走筆記子開弟

樓臺丹碧照天涯塞北江南未足誇千里煙波方種柳萬
株桃李未開花一麾同下西清路兩鎮高迎上將牙回首
林塘莫留戀風光還屬阿連家

靈泉寺

一掬寒泉照眼明冰霜凜凜坐中清生芻想見當時客誰
屋空留後世名曉日淨涵金碧影秋風暗動佩環聲他年

卜築南山下白首何人共濯纓

李中

中字至之清江人博學多聞與曾子固新淦三孔
善嘉祐二年進士官朝奉郎致仕歸

宿臨江驛

候館寥寥輟棹過酒醒無奈旅愁何雨昏郊郭行人少葦
暗汀洲宿雁多干祿已悲凋髮鬢結茅終愧負煙蘿篇章
早晚遲知己苦志忘形自有魔

王无咎

无咎字補之南城人嘉祐二年進士爲天台令棄
官從王荊公學後以薦官直講

遊麻姑山

仙輶昔日此流連
氣象遼遼尙宛然
溪落斷崖爲遠瀑
路從絕頂見平田
千年芝有靈禽戲
一洞雲留羽客眠
已樂勝遊塵境外
况陪清論酒尊前

王韶

韶字子純德安人嘉祐二年進士熙寧中累官至
龍圖閣學士知熙州拜觀文殿學士樞密副使罷
知洪州卒謚襄敏有敷陽集

詠裕老菴前老松

綠皮皴剝玉嶙峋
高節分明是古人
解與乾坤生氣槩
幾因風雨長精神
裝添景物年年別
裨闔窮愁日日新
惟有

碧霄雲裏月共君孤影最相親

劉 輝

輝元名幾字之道鉛山人嘉祐四年賜進士第一

官大理評事有東歸集

與客遊太平僧舍

兩道翠陰迎騎合四圍清氣逼人來林端有路雲千級物
外忘機酒一杯

余良弼

良弼字成國分寧人良肱弟嘉祐五年解試官盱

眙知縣

旌陽山

萬古嵯峨作鎮東下臨無地上摩空雨餘翡翠晴光變烟
散芙蓉秀色同元豹隱時疑隔霧玉龍降處誤成虹尋仙
莫道無真跡瑤草琪花有路通

黃廉

廉字夷仲分寧人庶弟嘉祐六年進士授宣州司
理參軍改祕書省著作佐郎累官至集賢殿修撰

石潭院次蟾禪師韻

一鉢誰知去住空前朝遺事寄禪宮孤吟盤礴數行墨古
韻蕭條四壁風遊客落帆頻上下荒庭疎樹幾青紅有人
會得詩中趣日月由來亦轉蓬

王安禮

安禮字和甫臨川人安石弟嘉祐六年進士累官翰林學士知開封府尚書左丞紹聖初罷知太原府卒有王魏公集

恭和御製上元觀燈

繁興清曉出瑤臺羽衛瞻迎扇影開鳳闕張燈天上坐雞林獻曲海邊來修文可笑秦無策能賦休誇楚有才星漢未斜鈞樂閣君王宣示萬年杯

瓊林苑賜宴餞留守太尉輒繼高韻

名德曾來重四夷朝廷今日見官儀陪詞自冠三公位分陝猶爲百辟師金谷望塵多眷舊瓊林賜餞盡承疑都人喜見旆旌美寧識勲名在鼎彝

翹院輪麥二十二韻呈開父

自訟愚且鄙平生事辭翰爲文謝超卓得祿未盈寸一官
走窮僻百事宜屈勉昨者得州帖輪租被公選麴舍只容
膝侍立如牛喘逢逢鼓咽耳漠漠塵翳眼微風六月忌烈
日四簷短一坐洒腥雨萬夫揮午汗斗升煩較量朱墨謾
勾竄豈惟畏刑書農事寧可緩賴有葛衣翁志趣頗高簡
愛民一心勞慰我百憂遣誰人坐華堂玉簾羅婉變清樽
近美竹冰紈依素扇賢愚定勞逸貴賤天所綰賦分乃自
然何須慕華弁况予山野姿風尚本蕭散紫纏正自取有
類蠶作繭得桷未知漸盈庭已占良悅怪舊學凋冥羨素
期舛便當謝官長趨墀來斂板才譎又不力引去非宜歎

贈別君重安撫太尉

簫鼓紛紛到酒樽
賢侯於此駐高軒
平明受詔辭龍闕
睿聖分憂在雁門
種落望塵迎漢使
吏民填道看王孫
一瞻車馬人皆樂
寧識安邊策畧存

上王端明生日

夢帝資良甫
生申協聖期
妙齡談國體
初筮得家規
侃侃當官色
循循待士辭
法官曾觸佞
諫紙詎容私
外歷藩宣久
歸參侍從宜
政聲雖召杜
學術本臯夔
業履今安匹
賢勞上所知
都畿重尹正
延閣舊論思
治出諸公右
經爲大帝師
三邊更惠愛
一體繫安危
羌虜跳西夏
朝家念北陲
秘庭還舊秩
左轄正新儀
暫屈并門重
其蘇晉國飢
指麾

榮旅拒談笑妥惇發鄴邑祠河急荊州禱雨遲怒波回渾
磧旱種變京坻道與千齡遇身將百祿隨民瞻方有裕天
龍益無疑俊乂思皇日欽明樂滑時緇衣如寵慶願續武
公詩

孔文仲

文仲字經父新淦人延之子嘉祐六年進士累官
至中書舍人後入黨籍與弟武仲平仲稱三孔有
清江三集

早行

客興謂已旦出視見落月瘦馬入荒陂霜花重如雪海風
吹萬里兩耳凍幾脫歲晏已苦寒近北尤凜冽况當清曉

行遡此原野濶笠飛帶繞頭指直不得結農家烟火微炙
手粗可熱豈能迂我留而就苟且活仰頭視四宇夜氣亦
漸豁苦心待正晝白日想不缺

秋月

孤枕夜何永破窻秋已寒雨聲衝夢斷霜氣襲衣單利劒
摧鋒鏑蒼鷗縮羽翰平生衝斗氣變作淚汎瀾

四月十三日慈孝寺山亭席上口占送子郭都運

送客城南寺蕭然雲泉秋客意在萬里聊行須臾遊昨夜
過新雨清風滿梁州簪裳合俊彥河圖並天球古來功名
人未就不肯休譬如鑿空使尙致安石榴矧今南畝氓往
徃東西流君能安輯之千倉與萬餉

將至南都中途感舊二首寄錢穆父

北風吹雪滿皇州攜手同爲落魄遊
霄漢路岐騰萬里江湖塵土積千憂
世情共逐飛蓬轉人事都如激浪遊
只待清談慰愁病月明幾夜促歸舟

蔣苒星霜七換年故人已上碧雲天
書憑去雁雖無便路出名都亦有緣
秋晚樓臺風作雪雨餘碕岸柳生煙
應煩北道開樽俎又費公庖幾萬錢

劉奉世

奉世字仲馮新喻人做子嘉祐六年進士官集賢校理樞密使入元祐黨籍

送越帥程公闕

使君遺愛徧南州五馬新歸瘴海頭持橐未厭青瑣直懷
章還作鑑湖遊餘姚人物傳吳遠越地山川向剡幽應有
清詩資卧理會吟他日記風流

駕幸太學

聖典垂精及表章曠儀親舉自宗庠縱觀橋擁浮雲蓋侍
問庭充振鷺行首舉儒風隆上國光增帝業掩前王太平
榮遇慚多幸重見歌虞起廟堂

會宰

宰字子翊南豐人羣弟嘉祐六年進士官舒州參
軍湘潭縣主簿

舒州寄王介夫

官居隱几望潯山不似茅簷舊日閒
顧我塵沙添白髮憐君道路失朱顏
江涵秋老鱸魚美岸入春風荻筍斑
此味總佳吾不樂惟思一馬返鄉關

孔武仲

武仲字常父新淦人嘉祐八年進士歷官禮部侍郎出知洪宣二州坐黨籍奪職居池州卒

鄂州

綠柳陰陰蔽武昌汀洲如畫引帆檣
一江見底白秋色千里無風正夕陽
暫別勝遊渾老大追思前事只淒涼
賢豪現有遺蹤在欲買溪山作漫郎

張秉叔出紫雲回鑾圖以示坐客因爲賦之

開元太平無兵戎真人味道希夷中人間之樂已饒足唯
有青霄未追逐坐中誰似葉先生以氣爲糧常辟穀朝登
眞嶠夕崐崙只與神遊不要人忽逢邀攜看月去縹緲虛
空生紫雲蟾官竟不容久住仙樂飄飄送回去歸來官病
未移更甲帳明釭宛如故汾水悲歌仙不成梨園空沒有
遺聲紅塵如海漲朝市從此無人游玉京

臥龍潭

已登臥龍庵更看臥龍瀑來從不盡山奔入無底谷谷中
鳴百雷林外漱寒玉雄豪與青泚上下相接續陽崖發幽
花陰壑偃喬木兩崖天劃開萬古神潛伏我來坐潭上俯
仰清耳目神骨倍瀟灑衣襟仍靄靄名山到能幾好景看

不足慙慙莫思歸更共潭邊宿

尋真觀

武皇車駕東南出訪道求仙希萬一
屏風九疊雲物清意恐神仙藏此室
羽章之館締構新壇場夜夜祈星辰
蓬萊縹緲不可到橋山一閉逾千春
詠真之天在旁側白晝潭心飛霹靂
田收歲美龍亦閒唯有濟淪照空碧
誰道尋真是女郎朝餐松桂夜焚香
明眸綠鬢今何在意已霞衣侍玉皇

瓜步阻風

昨日焚香謁聖母青山掬躬如負弩
但乞天開萬里明歸去浮雲戢風雨
謂宜言發卽響報豈知神不聽我語
門前

白浪如銀山江上狂風如怒虎船癡艣硬不能拔未免棲
遲傍洲渚輕盈但愛白鷗飛顛顛可憐芳草舞三江五湖
歷已盡勢合平夷反齟齬上水歌呼下水愁北船縈紲南
船去寄言南船英雄豪萬事低昂如桔槔我當賣劍買牲
牢再掃靈宇陳肩尻黃金壺樽沃香醪神喜借以南風高
揚帆拍手笑爾曹不知流落何江臯荒洲寂寥聽怒號

清涼寺

白寺荒灣畧艤舟攜筇來作上方遊何年巧匠開山骨自
古精兵聚石頭故壘無人空向夕高堂問話凜生秋雲庵
快望窮千里一借澄江洗客憂

題山光樓

山靜圍平野樓高映碧空人居仙島曲天入畫屏中倚檻
雲蟾近傾觴客興同扁舟期一到須借五湖風

送梅子明還吳

姑蘇限雲水官舍隱蓬萊出沐青山湧橫江畫舸開家園
雖渴到書社早歸來新命鄉人喜神仙舊姓梅

車家行

上坂車聲遲下坂車聲快遲如鬼語相喧啾快如溪沙瀉
鳴漚一車人十捧擁行江南江北不計程青天白日有時
住無人止得車輪聲晚來驟雨聲濯濯平曉郊原盡溝壑
方悟車家進退難不如田家四時樂

松上老藤

在二聖寺

古木已昂藏長藤亦奇怪潛根蒼蘚中矯尾青雲外巖巖
秋霜剝悠悠夏景曬摧殘復長養鍛鍊成老大蛇蟠筋脈
壯龍死軀殼在他時雷破山大雨灑滂沛茲松若變化無
乃遭結礙附枝物所患奪朱古爲戒何不淬斧斤誅鋤此
蕭艾

平陽歎

壞雲如山壓齊壘六軍顏色如灰死高耶元自解琵琶萬
歲無愁作天子伯升何曾上青天濺血遺痕草澤間長城
萬里自推仆駿馬只馱馮小憐姦臣百計爲蝨賊不但妖
娥解傾國熊羆哮鬪蹙平陽馮妃對鏡嬌櫳妝死生契闊
不相棄雙雙刎頸長安市

發玉務

曉隨燈火背千家落盡疎星見遠霞
一餉春聲回宿鳥半天寒色在啼鴉
臨陂弱柳猶藏葉當路殘梅已盡花
賴值時光正妍潤穩看風物到京華

旅枕

旅枕春風底翛然一夢驚漏移清禁遠
天入小窗明桂玉梁園費山椒楚客情
蕭條過百五猶有賣花聲

蘇子瞻雪堂

古縣東邊仄徑開先生從此斲蒿萊
鸞鳳一去應不返花柳當年皆自栽
畫壁蒼茫留水墨朱欄剝落長莓苔
鄰翁笑我來何暮檢點風煙興盡回

發湘陰北寺江亭

古縣幾新剝孤亭占上頭
野苔侵坐綠江水帶天流
絲斷湘靈瑟蘋荒帝子洲
人寰真似夢頃刻已千秋

江西詩徵卷八

江西詩微卷九

南城會輿寶谷編輯

宋

黃庭堅

庭堅字魯直號山谷老人又號涪翁分寧人庶子
治平四年進士官秘書丞紹聖初坐修神宗實錄
失實貶涪州別駕黔州安置建中靖國初召還知
太平州復除名編管宜州卒有豫章集精華錄

題竹石牧牛圖

野次小嶂巖幽篁相依綠阿童三尺箠御此老
巖棘石吾甚愛之勿遣牛礪角牛礪角尚可牛
鬪殘我竹

記夢

衆真妙絕擁靈君曉然夢之非紛紜窗中遠山是眉黛席
上榴花皆舞裙借問琵琶得聞否靈君色莊妓搖手兩客
爭碁爛斧柯一兒壞局君不呵杏梁歸燕空語多奈此雲
窗霧閣何

宗室公壽挽詞

昔在熙寧日葭莖接貴游題詩奉先寺橫笛寶津樓天網
恢中夏賓筵禁列侯但聞劉子政頭白更清修

觀伯時畫馬禮部試院作

儀鸞供帳饗蟲行翰林溼薪爆竹聲風簾官燭淚縱橫木
穿石盤未渠透坐窗不遊令人瘦貧馬百蔽逢一豎眼明

見此玉花驄徑思著鞭隨詩翁城西野桃尋小紅

青奴

櫻李四弦風掃席昭華三弄月侵牀我無紅袖堪娛夜正
要青奴一味涼

題石牛洞石上

鬱鬱窈窈天官宅諸峯排霄帝不隔六時謁天開關鑰我
身金華牧羊客羊眠草閣我世闕高真衆靈思我還石盆
之中有甘露青牛駕我山谷路

周昉美人琴阮圖

周昉富貴女衣飾新舊兼髻重髮根急薄粧無意添琴阮
相與娛聽絲不停手數腴竹馬郎跨馬要折柳

觀秘閣蘇子美題壁詩

仁祖康四海本朝盛文章蘇郎如虎豹孤嘯翰墨場風流
映海岱峻鋒不可當學書窺法窟當代見崔張銀鉤刻琬
琰蠆尾迴縑紉擢登羣玉府高閣目生光春風吹曉雨禁
直夢滄浪人聲市朝遠簾影花燭涼秋荷瀕筆硯怨句挾
風霜不甘老天祿誠欲升未央小臣膽如斗侏儒俸一囊
請提師十萬奉辭問犬羊歸鞍飲月支伏膺咎中行人事
喜乖忤南遷得夜航此時調玉燭日行中道黃柄臣似牛
李傾奪謀未臧薄酒圍邯鄲老龜禍枯桑兼官百郡邸報
賽用歲常招延青雲士共醉椒糲觴俗客避白眼徵歌舞
紅裳謗書動宸極牢戶繫桁楊一網收冠蓋九衢人走藏

庖丁提刀立滿意無四旁論罪等饕餮囚衣禦方良姑蘇
麋鹿曠風月有書堂永無湔祓期山鬼共幽篁萬戶封侯
骨今成狐兔岡邇來四十年我亦校書郎雄文終膾炙妙
墨見垣牆高山仰豪氣崢嶸乃不亡張侯開詩卷詞章尚
軒昂草書十餘紙雨漏古屋廊誠知千里馬不服萬乘箱
遂令駕鼓車此豈用其長事往飛鳥過九原色莽蒼敢告
大鈞手才難幸扶將

絕句

黃葉委庭觀九州小蟲催女獻工裘金錢滿地無人費百
斛明珠惹秋

宿錢塘尉廨

平湖繞舍山無盜官事長閒俸有金安得終身爲禦寇不
辭兒女作吳音

題東丁水

古人題作東丁水自古東丁直到今我爲改名方響洞
知山水有清音

古風上蘇子瞻

元豐元年
北京作

江梅有佳實託根桃李場桃李終不言朝露借恩光孤芳
忌皎潔冰雪空自香古來如鼎實此物升廟廊歲月坐成
晚烟雨青已黃得升桃李盤以遠初見嘗終然不可口擲
置官道旁但使本根在棄捐果何傷

青松出澗壑十里間風聲上有百尺絲下有千歲苓自性

得久要爲人制頽齡小草有遠志相依在平生醫和不並
世深根且固蒂人言可醫國何用太早計小大才則殊氣
味固相似

子瞻詩句妙一世乃云效庭堅體蓋退之戲效孟郊
樊宗師之比以文滑稽耳恐後生不解故以韻道之
我詩如曹鄴淺陋不成邦公如大國楚吞五湖三江赤壁
風月笛玉堂雲霧窗句法提一律堅城受我降枯松倒澗
壑波濤所舂撞萬牛挽不前公乃獨力扛諸人方嗤點渠
非晁張雙但懷相識察牀下拜老龐小兒未可知客或許
敦龐誠堪壻阿巽買紅纏酒釭

送李德素舒城

僧夏莫問塗麥秋宜煮餅北寺旬休歸長廊六月冷簟翻
寒江浪茶破蒼壁影李侯爲我來遽以歸期請青衿廢詩
書白髮遲定省荒畦當鉏灌蠹簡要籤整挽衣不可畱決
去事幽屏天恢獵德網日僖養賢鼎此事落江湖熟思令
人癭胃中吉祥宅膜外榮辱境婆娑萬物表藏刃避緊肯
人生要當學安燕不徹警古來惟深地相待汲修綆

贈秦少儀

觀

汝南許文休馬磨自衣食但聞郡功曹滿世名籍籍渠命
有顯晦非人作通塞秦氏多英俊少游眉最白頗聞鴻雁
行筆背萬人敵吾早知有覲而不知有覲少儀袖詩來刮
蚌珠的鑠乃能持一鏃與我箭鋒直自吾得此詩三日臥

向壁攬士不能寸推去輒數尺才難不其然有亦未易識

次韻謝斌老送墨竹十二韻

古今作生竹能者未十輩吳生勒枝葉筌案遠不逮江南
鐵鉤鎖最許誠懸會燕公洒墨成落落與時背譬如剗心
松中有歲寒在湖州三百年筆與前哲配規摹轉銀鉤國
寶非俗愛披圖風雨入咫尺莽蒼外吾子學湖州師逸功
已倍有來竹四幅冬夏生變態預知更入神後出遂無對
吾詩被壓倒物固不兩大

次韻子瞻題郭熙畫秋山

黃州逐客未賜環江南江北飽看山玉堂臥對郭熙畫發
興已在青林間郭熙官畫但荒遠短紙曲折開秋晚江村

煙外雨脚明歸雁行邊餘疊巘坐思黃甘洞庭霜恨身不
如雁隨陽熙今頭自有眼力尚能弄筆映窗光畫取江南
好風日慰此將老鏡中髮但熙肯畫寬作程五日十日一
水石

詠李伯時摹韓幹三馬次蘇子由韻簡伯時兼寄李
德素

太史瑱窗雲雨垂試開三馬拂蛛絲李侯寫影韓幹墨自
有筆如沙畫雖絕塵超日精爽緊若失其一望路馳馬官
不語臂指揮乃知仗下非新羈吾嘗覽觀在圉馬驚駘成
列無權奇緬懷胡沙英妙質一雄可將十萬雌決非厮養
所成就天驥生駒人得之千金市骨今何有士或不價五

殺皮李侯畫隱百寮底初不自期人誤知戲弄丹青聊卒
歲身如閱世老禪師

次韻子瞻和子由觀韓幹馬因論伯時畫天馬

于闐花驄龍八尺看雲不受絡頭絲西河驄作葡萄錦雙
瞳夾鏡耳卓錫長楸落日試天步知有四極無由馳電行
山立氣深穩可耐珠羈白玉羈李侯一顧歎絕足領畧古
法生新奇一日真龍入圖畫在坰羣雄望風雌曹霸弟子
沙苑丞喜作肥馬人笑之李侯論幹獨不爾妙盡骨相遺
毛皮翰林評書乃如此賤肥貴瘦渠未知況我生平賞神
俊僧中云是道林師

次韻王炳之惠玉版紙

王侯須若綠坡竹哦詩清風起空谷古田小賤惠我百信
知溪翁能解玉鳴礪千杵動秋山裹糧萬里來輦轂儒林
丈人有蘇公相如子雲再生蜀往時翰墨頗橫流此公歸
來有邊幅小楷多傳樂毅論高詞欲奏雲門曲不持歸掃
蘇公門乃令小人今拜辱去騷甚遠文氣卑畫虎不成書
勢俗董狐南史一筆無誤掌殺青司記錄雖然此中有公
議或辱五鼎榮半菽願公進德使見書不敢求君米千斛
雙井茶送子瞻

人間風月不到處天上玉堂森寶書想見東坡舊居士揮
毫百斛瀉明珠我家江南摘雲腴落礪霏霏雪不如爲公
喚起黃州夢獨載扁舟向五湖

常父答詩有煎點徑須煩綠珠之句復次韻戲答
小鬟雖醜巧粧梳掃地如鏡能檢書欲買娉婷供煮茗我
無一斛明月珠知公家亦闕掃除但有文君對相如政當
爲公乞如願作牋遠寄宮亭湖

以團茶洮州綠石研贈無咎文潛

晁子智囊可以括四海張子筆端可以回萬牛自我得二
士意氣傾九州道山延閣委竹帛清都太微望冕旒貝宮
胎寒弄明月天網下罩一日收此地要須無不有紫皇訪
問富春秋晁無咎贈君越侯所貢蒼玉璧可烹玉塵試春
色澆君胸中過秦論斟酌古今來活國張文潛贈君洮州
綠石含風漪能淬筆鋒利如錐請書元祐開皇極第入思

齊訪落詩

謝送礪賜壑源揀芽

禱雲從龍小蒼璧元豐至今人未識壑源包貢第一春
緗匳礪香供玉食睿思殿東金井欄甘露薦椀天開顏橋山
事巖庀百局補袞諸公省中宿中人傳賜夜未央雨露恩
光照宮燭左丞似是李元禮好事風流有涇渭官憐天祿
校書郎親敕家庭遺分似春風飽識大官羊不慣腐儒湯
餅腸搜攬十年燈火讀令我胸中書傳香已戒應門老馬
走客來問事莫載酒

以小團龍及半挺贈無咎并詩用前韻爲戲

我持元圭與蒼璧以暗投人渠不識城南窮巷有佳人不

索檳榔常晏食赤銅茗椀雨斑斑銀粟翻光解破顏上有
龍文下棋局擔囊贈君諾已宿此物已是元豐春光皇聖
功調玉燭鬼子胸中開典禮平生自期幸與渭故用澆君
磊塊曾莫令髣髴毛霜相似曲几團蒲聽煮湯煎成車聲繞
羊腸雞蘇胡麻畱渴羌不應亂我官焙香肥如瓠壺鼻雷
吼幸君飲此勿飲酒

次韻子瞻寄眉山王宣義

叅軍但有四立壁初無臨江千木奴白頭不是折腰具桐
帽棕屨稱老夫滄江鷗鷺野心性陰壑虎豹雄牙須鵬鷖
作裘初服在猩血染帶鄰翁無昨來杜鵑勸歸去更得把
酒聽提壺當令人材不乏使天上二老須人扶兒無飽飯

尚勤書婦無複禪且著襦社饗可漉溪可漁更問黃雞肥
與癯林間醉著人伐木猶夢官下聞追呼萬釘圍腰莫愛
渠富貴安能潤黃壚

聽宋宗儒摘阮歌

翰林尚書宋公子文采風流今尚爾自疑耆域是前身囊
中探丸起人死貌如千歲枯松枝落魄酒中無定止得錢
百萬送酒家一笑不問今餘幾手揮琵琶送飛鴻促絃聒
醉驚客起寒蟲催織月籠秋獨雁叫羣天拍水楚國騶臣
放十年漢宮佳人嫁千里深閨洞房語恩怨紫燕黃鸝韻
桃李楚狂行歌驚市人漁父擘舟在葭葦問君枯木著朱
繩何能道人意中事君言此物傳數姓元璧庚庚有橫理

閉門三月傳國工身今親見阮仲容我有江南一邱壑安
得與君醉其中曲肱聽君寫松風

答黃冕仲索煎雙井并簡揚休

江夏無雙乃吾宗同舍頗似王安豐能澆茗椀湔被我風
袂欲挹浮邱翁吾宗落筆賞幽事秋月下照澄江空家山
鷹爪是小草敢與好賜雲龍同不嫌水厄幸來辱寒泉湯
鼎聽松風夜堂朱墨小燈籠惜無纖纖來捧椀唯倚新詩
可傳本

再答冕仲

邱壑詩書誰數窮田園芋栗頗時豐小桃源口雨繁紅春
溪蒲稗沒鳬翁投身世網夢歸去摘山鼓聲雷隱空秋堂

一笑共燈火與公草木臭味同安用茗澆磊塊留他日過
飯隨家風買魚貫柳雞著籠更當力貧開酒碗走謁鄰翁
稱子本

演雅

桑蠶作繭自纏裹珠螯結網工遮邏燕無居舍經始忙蝶
爲風光勾引破老鶻御石宿水飲穉蜂趨衙供蜜課鵲傳
吉語安得閑雞催晨興不敢臥氣陵千里蠅附驥枉過一
生蟻旋磨蝨聞湯沸尚血食雀喜宮成自相賀晴天振羽
樂蜉蝣空穴祝兒成螺贏蛄蜢轉丸賤蘇合飛蛾赴燭甘
死禍井邊蠹李螬苦肥枝頭飲露蟬常餓天螻伏隙錄人
語射工含沙須影過訓狐啄屋真行怪蠨蛸報喜太多可

鴈鷗客何魚蝦便白鷺不禁塵土流絡緯何嘗省機織布
穀未應勤種播五技鼯鼠笑鳩拙百尺馬虵憐驚跛老蚌
胎中珠是賊醯雞裏天幾大螳螂當轍恃長臂熠熠宵
行驚照火提壺猶能勸沽酒黃口只知食飯顆伯勞饒舌
世不問鸚鵡纔言便關鎖春蛙夏蜩更嘈雜土蚓壁蟬何
碎瑣江南野水碧於天中有狎鷗閒似我

王充道送水仙花五十枝欣然會心爲之作韻

凌波仙子生塵襪水上輕盈步微月是誰招此斷腸魂種
作寒花寄愁絕含香體素欲傾城山礬是弟梅是兄坐對
眞成被花惱出門一笑大江橫

書磨崖碑後

春風吹船著浯溪扶藜上讀中興碑平生半世看墨本摩
崖石刻髣成絲明皇不作苞桑計顛倒四海由祿兒九廟
不守乘輿西萬官已作烏擇棲撫軍監國太子事何乃趣
取大物爲事有至難天幸爾上皇跼蹐還京師內間張后
色可否外間李父頤指揮南內淒涼幾苟活高將軍去事
尤危臣結春陵二三策臣甫朴鵬再拜詩安知忠臣痛至
骨世上但賞瓊琬詞同來野僧六七輩亦有文士相追隨
斷崖蒼蘚對立久凍雨爲洗前朝悲

次韻柳通叟寄王文通

故人昔有凌雲賦何意陸沉黃綬間頭白眼花行作吏兒
婚女嫁望還山心猶未死杯中物春不能朱鏡裏顏寄語

諸公肯湔祓割雞得令近鄉關

題落星寺

落星開士深結屋龍閣老翁來賦詩
小雨藏山客坐久長江接天帆到遲
宴寢清香與世隔畫圖妙絕無人知
蜂房各自開戶牖處處煮茶藤一枝

戲詠子舟畫兩竹兩鸚鵡

風清日煖搖雙竹竹間相語兩鸚鵡
鸚鵡之內不可肴人生不材果爲福
子舟之筆利如錐千變萬化皆天機
未知筆下鸚鵡語何似夢中蝴蝶飛

聽崇德君鼓琴

月明江靜寂寥中大家斂袂撫孤桐
古人已矣古樂在髣

言得 卷九
歸雅頌之遺風妙手不易得善聽良獨難猶如優曇華時
一出世間兩忘琴意與已意迺似不著十指彈禪心默默
三淵靜幽谷清風淡相應絲聲誰道不如竹我已忘言得
真性罷琴窗外月沉江萬籟俱空七絃定

次韻子實題少章寄寂齋

虛名誤壯夫今古可笑閔屍褻萬里歸書載五車攜安知
衡門下身與天地準秦晁兩美士內行頗修謹余欲造之
深抽琴去其軫寄寂喧間此道有汲引獄戶聞笞榜市
聲雜嘲譌二生對曲肱圭玉發石蘊小大窮鵬鷃短長見
椿槿欲聞寂時聲黃鍾在龍符

武昌松風閣

依山築閣見平川夜闌箕斗插屋椽我來名之意適然老
松魁梧數百年斧斤所赦今叅天風鳴嫺皇五十絃洗耳
不須菩薩泉嘉二三子甚好賢力貧買酒醉此筵夜雨鳴
廊到曉懸相看不歸臥僧廬泉枯石燥復潺湲山川光輝
爲我妍野僧早飢不能飽曉見寒谿有炊煙東坡道人已
沉泉張侯何時到眼前釣臺驚濤可晝眠怡亭看篆蛟龍
纏安得此身脫拘攣舟載諸友長周旋

予旣作竹枝詞夜宿歌羅驛夢李白相見於山間曰
予往謫夜郎於此聞杜鵑作竹枝詞三疊世傳之不
予細憶集中無有請三誦乃得之

一聲望帝花片飛萬里明妃雪打圍馬上健兒那解聽琵琶

琵琶應道不如歸

竹竿坡面蛇倒退
摩圍山腰胡孫愁
杜鵑無血可續淚
何日金雞赦九州

命輕人鮮癭頭船
日瘦鬼門關外天
北人墮淚南人笑
青壁無梯聞杜鵑

戲贈米元章

萬里風帆水着天
麝煤鼠尾過年年
滄江靜夜虹貫月
定是米家書畫船

曉起臨汝

缺月欲崢嶸
鳴雞有期信
征人催夙駕
客夢未渠盡
野荒多斷橋
河凍無裂壟
羸馬踏冰翻
疑狐觸林
遁清風
蕩初

日喬木嘯園嶺崧高忽在眼峩峩臨數郡元雲默垂空意
有萬里潤寒暗不成雨卷懷就膚寸觀象忠古人動靜配
天運物得斯一時無來乃至順涼暄但循環用舍誰喜慍
安得忘言者與講齊物論

以右軍書數種贈王十四

王郎氣如春景晴風暄百草草木生眼如霜鵲齒玉冰擁
書環坐愛窗明松花泛硯摹真行字身藏穎秀勁清問誰
學之果蘭亭我昔頗復戲墨卿銀鈎蠶尾爛箱籠贈君鋪
案黏曲屏小字莫作癡凍蠅樂毅論勝遺教經大字無過
瘞鶴銘官奴作草欺伯英隨人作計終後人自成一家始
逼真卿家小女名阿潛眉目似翁有精神試畱此書他日

學往往不減衛夫人

夏日夢伯兄寄江南

故園相見畧雍容
睡起南窗日射紅
詩酒一年談笑隔
江山千里夢魂通
河天月暈魚分子
樹葉風微鹿養茸
幾度白沙青影裏
審聽嘶馬自搢筇

同孫不愚過昆陽

田園恰恰值春忙
驅馬悠悠昆水陽
古廟藤蘿穿戶隔
斷碑風雨碎文章
真人寂寞神爲社
堅壘委蛇女採桑
拂袖村帘誇酒好
爲君聊解一瓢嘗

寄黃幾復

我居北海君南海
寄雁傳書謝不能
桃李春風一杯酒
江

湖夜雨十年燈持家但有四立壁治病不靳三折肱想得
讀書頭已白隔溪猿哭瘴溪藤

寄上叔父夷仲

少年有功翰墨林中歲作吏幾陸沈庖丁解牛妙世故監
市履稀知民心萬里書來兒女瘦十月山行冰雪深夢魂
和月遶秦隴漢節落毛何處尋

關寒塞雪欲飼音燕雁拂天河魚沉百書不如一見面幾
日歸來兩慰心弓刀陌上望行色兒女燈前語夜深更懷
父子東歸得手種江頭柳十尋

次韻宋樸宗三月十四日到西池都人盛觀翰林公

出游

金狻繫馬曉鶯邊不比春江上水船人語車聲喧法曲花
光樓影倒晴天人間化鶴三千歲海上看羊十九年還作
遨頭驚俗眼風流人物屬蘇仙

次韻楊君全送酒長句

扶衰却老世無方唯有君家酒未嘗秋入園林花老眼苦
搜文字響枯腸醉頭夜雨排簷滴盃面春風繞鼻香不待
澄清遣分送定知佳客對空觴

和高仲本喜相見

雨昏南浦曾相對雪滿荊州喜再逢有子才如不羈馬知
公心是後彫松閒尋書冊應多味老傍人門似更慵何日
晴軒觀筆硯一樽相屬要從容

湖口人李正臣蓄異石九峰東坡名曰壺中九華并
爲作詩後八年自海外歸過湖口石已爲好事者所
取乃和前篇以爲笑寔建中靖國元年四月十六日
明年當崇寧之元五月二十日庭堅繫舟湖口李正
臣持此詩來石旣不能復見東坡亦下世矣感慨不
足因次前韻

有人夜半持山去頓覺浮嵐暝翠空試問安排華屋處如
何零落月明中能迴趙璧人安在已入南柯夢不通賴有
霜鐘難席卷袖椎來聽響玲瓏

王才惠梅花三種皆絕妙戲答

城南名士遣春來三月乃見臘前梅定知鎖著江南客故

放綠梢春晚回

舍人梅塢無關鎖携酒俗人來未曾舊時愛菊陶彭澤今
作梅花樹下僧

病夫中歲屏朽杓百葉緗梅觸撥人拂殺官黃春有思滿
城桃李不能春

往歲過廣陵值早春嘗作詩云春風十里珠簾捲髣
髴三生杜牧之紅藥梢頭初蠶栗綠楊風動髣成絲
今春有自淮南來者道揚州事戲以前韻寄王定國
淮南二十四橋月馬上時時夢見之想得揚州醉年少正
圍紅袖寫烏絲

日邊置論誠深矣聖處時中乃得之莫作秋蟲促機杼貧

家能有幾絢絲

寺齋睡起

桃李無言一再風黃鸝唯見綠
忽忽人言九事八爲律倘
有江船吾欲東

次韻王稚川客舍

身如病鶴翅翎短心似亂絲頭緒多
此曲朱門歌不得湖
南湖北竹枝歌

雨中登岳陽樓望君山

投荒萬死髣髴斑生入瞿塘濫潁關
未到江南先一笑岳
陽樓上對君山

滿川風雨獨凭欄綰結湘娥十二鬟
可惜不當湖水面銀

山堆裏看青山

寄賀方回

少游醉臥古藤下誰與愁眉唱一杯解作江南斷腸句只
今唯有賀方回

伯時彭蠡春牧圖

岳陽樓上春已歸湖天鴻雁拍波飛布帆天闊隨鳥道石
林風晚吹人衣春水初生及馬腹浮灘欲上西山麓遙看
絕頂秀雲松上有垂蘿暗溪谷沙眠草嚙性不驕側身注
目鳴相招林間瞥過星燦燦原上欲立風蕭蕭君不見中
原真種胡塵沒南行市骨何倉卒祇收力健哉征夫肯向
時危辨奇骨卽今貢馬西北來東西坊監屯雲開紛然驚

驥同一秣爾可不憂四蹄脫

觀劉永年團練畫角鷹

劉侯才勇世無敵愛畫工夫亦成癖
弄筆掃成蒼角鷹殺氣稜稜動秋色
爪拳金鉤背屈鐵萬里風雲藏勁翮兀立
槎枒不畏人眼看青冥有餘力霜飛晴空
塞草白雲垂四海陰山黑此時軒然盍飛
去何乃噴吼立西壁只應真骨下人世不
謂雄姿畱粉墨造次更無高鳥喧等閒亦
恐狐狸嚇旁觀未必窮神妙乃是天機貫
胸臆瞻相突兀摩空物逢真賞世所珍此
畫他年恐難得

還家呈伯氏

去日櫻桃初破花歸來著子如紅豆四時驅迫少須臾兩
鬢飄零成老醜永懷往在江南日原上急難風雨後私田
苦薄王稅多諸弟號寒諸妹瘦扶將白髮過江來吾二人
如左右手苟從祿仕我適回且慰家貧兄孝友強趨手版
汝陽城更責愆期被訶詬法官毒螫草自搖丞相霜威人
避走賤貧孤遠蓋如此此事端於我何有一囊粟麥七千
錢五人兄弟二十口官如元亮且折腰心似次山羞曲肘
北窗書冊久不開筐篋黃塵生鑲鈕何當略得共討論况
乃雍容把盃酒意氣敷腴貴壯年不早計之且衰朽安得
短船萬里隨江風養魚去作陶朱公斑衣奉親伯與儂四
方上下相依從用舍山人不出已乃是伏轡駒犢耳

林爲之送筆戲贈

閒生作三副規模宣城葛外貌雖銑澤毫心或粗糲
將希栗尾掘廼成聚核李慶縛散卓含墨能不洩病在
轄白毫往往半巧拙小字亦周旋大字難曲折時時一
毛亂廼似逆梳髮張鼎徒有表徐偃元無骨模畫記姓
名亦可應倉卒爲之街南居時通鈴下謁晴軒坐風涼
怪我把枯筆開囊撲蠹魚遣奴送一束沈硯磨松煤揮
洒至日沒早年學屠龍適用固疎闊廣文困蘊鹽烹茶
對秋月略無人問字况有客投轄文章寄呻吟講授費
頰舌閒無用心處雌黃到筆墨時不與人游孔子尚愛
日作詩當鳴鼓聊自攻

短闕

再和答爲之

君勿嘲廣文
迺寒被絺葛
君勿嘲廣文
窮年飯糗常恐
俎豆予與世
充肴核凡木不願材
大折小枝洩櫟依曲轅
社聊用神其拙
吾家本江南一邱藏曲折
瀕溪蔭蒼簣
蕭洒可散髮
旣無使鬼錢又無封侯骨
薄祿庇閒曹且免受
逼卒爲此懶出門
徒敝懷中謁直齋
賓客退風物共落筆
詩成著床頭不知今幾束
君何向予勤見詩歎埋沒
嗣宗須酒澆未信胸懷闊
自狀一片心碧潭浸寒月
令德咸來教爲君賦車轄
君思揚雄咤何似張儀舌
此意恐大狂願爲引繩墨
政使此道非改過從今日
報章望瓊琚勿使音塵闕

再和答爲之

林君維岡英數而成瓜葛鄰居接杖藜過飯厭疎糲讀書
飽工夫論事極精核奮身君子場勇若怒未洩窮年栖旅
巢由命非由拙王良驅八駿方駕度九折學堂疎雨餘石
砌長苔髮弟子肥如瓠先生瘦惟骨北門一都會塵埃人
卒卒高蓋如秋荷勢利相奔謁唯君尚寂寞來觀草元筆
斯文未易陳政當高閣束金馬事陸沉市門逐乾沒未須
相賢愚聊自嘲迂闊憶昨戲贈詩廼欲報明月極知推挽
意我車君欲轄屠龍真狂言奔馬不及舌賜書盈五車直
令方二墨會意便欣然餘事過窗日尚恐素餐錢諸生在
城闕

奉和王世弼寄上七兄先生用其韻

宮槐弄黃黃蓮葉綠婉婉時同二三友竹軒涼夏晚駕言
都城南以望征軍返何知苦淹回及此秋景短悲思令人
瘦舉目道路遠西風脫一葉薦士聞鄉選簡書催渡河賓
客不得展親憂對叢萱婦病廢巾盥言趨厭次城鞭馬倦
長阪棗林蔽天日交陰不容徹仰看寔離離憶見花纂纂
異鄉懷節物不共斟酒盞舉場下馬入深鎖嚴箭管諸生
所程書拈束若稽科密燈坐回環丹硯精料束披榛披芝
蘭斷石收琰琬紛爭一日事聲實溷端窾天球或弃遺斗
符尚何算西歸到官舍塵土昏案版寒窗穿碧甃滿礎闌
蒼蘚詩書鵠巢翻帷幔蛛絲罥果知兄未來光陰坐晚晚

昨蒙叔父報亦歎音書簡薄言使事重激切被天遣逋流
一方病責任婉和扁咨詢懷靡及不皇暇息偃嚼水進糜
飧衝雪踏層巘嚴霜八月飛貂狐無餘煥念嗟叔母劉窮
年寄甥館尚憐公初黠誘掖到昭宛庭堅薄才資行又出
哇町浮雲與世疎短綆及道淺匠伯首慙回大樗終偃蹇
學官尸廩入奉養闕豐腆學徒日新聞孤陋猶舊典小材
渠困我持斲問輪扁大材我屈渠越雞當鵠卵未能引分
去戀祿幸苟免平生報一飽從事極匱勉豈如不見收放
身就閒散思伯臥江南無心趣軒冕龐翁跡頗親黃蘗門
屢歎齋餘佛飯香茶沸甘露滿逢人問進退餘事寄一筥
仲父挾高材甘爲溝中斷青黃可犧樽薦廟配瑚璉季父

有逸興未嘗入都輦臨流呼釣船拂石弄琴阮雍容從朋
交林下追游衍田園雖足樂及時思還返陰寒不鳴條望
損倚門眼南枝喜鵲鳴尺素托黃犬又以窰窰畱歸期指
姑洗寄聲問僧護兒髮可以綰妙言對賓客稱渠萬金產
爾來弄筆硯墨水惡翻建大字如棲鴉已不作肥軟得論
未徹章政苦諸叔懶新詩開累紙欲罷不能卷遠懷託孤
高別思盈繼綵秋月鳴夜潮枯槩凍金枕疎杵韻寒砧幽
泉流翠篴吟哦口垂涎嚼味有餘雋傳示同好人我家東
牀坦風煙意氣生揮毫寫藤蠶獵山窮鶻駕罩海極蝦蜆
銀鈎亂眼膜佳句濯肺腕且言伯在野朋友必推挽五泰
列清廟聖緒今皇續真儒運斗樞道化廻天顯朝論惜才

難選民大蒐獮豈聞任方物包貢遺羽絳招軍必翹翹前
席思饗饗王甥欲好懷高意恐難轉長篇題遠筒封寄淚
空潛遙知雲際開灰飛黃鍾管

贈張仲謀

車如雞栖馬如狗閉門常多出門少去天尺五張公子官
居城南池館好健兒快馬紫游韁迎我不知沙路長江榆
老柳媚寒日枯荷小鴨凍野航津人刺船起應客遙知故
人一水隔下馬索酒呼三遲騎奴笑言客竟癡向來情義
比瓜葛萬事略不置町畦追數存亡異憂樂燭如白虹貫
酒卮開軒臨水弄長笛吹落殘月風淒淒城頭漏下四十
刻破魔驚睡聽新詩君詩清壯悲節物政與秋蟲同一律

爾來更覺苦語工思婦霜砧搗寒月朱顏綠髮深誤人不
似草木長青春潔身好賢君自有今日相看進於舊以茲
敢煩一杯酒爲太夫人千歲壽

戲贈彥深

李髯家徒立四壁未嘗一飯能畱客春寒茆屋交相風倚
牆捫蝨讀書策老妻甘貧能養姑寧剪髮鬢不典書大兒
得殮不索魚小兒得袴不索襦庾郎鮭菜二十七太常齋
日三百餘上丁分膳一飽飯藏神夢訴羊躑蔬世傳寒士
有食籍一生當飯百甕殖冥冥主張審如此附郭小圃宜
勤鋤葱秧青青葵甲綠早韭晚菘羹糝熟充虛解戰賴湯
餅芼以萍蘆與甘菊幾日憐槐已著花一心呪笋莫成竹

羣兒笑髯窮百巧我謂勝人飯重肉羣兒笑髯不若人我
獨愛髯無事貧君不見猛虎卽人厭麋鹿人還寢皮食其
肉濡需終與豕俱焦飫肥擇甘果非福蟲蟻無知不足驚
橫目之民萬物靈請食熊蹯楚千乘立死山壁漢公卿李
髯作人有佳處李髯作詩有佳句雖無厚祿故人書門外
猶多長者車我讀揚雄逐貧賦斯人用意未全疎

和謝公定征南謠

傳聞交州初陸梁東連五溪西氏羌軍行不斷蠻標盾謀
主皆收漢畔亡合浦譙門腥血沸晉興城下白骨荒謀臣
異時坐致寇守臣今日愧苞桑已遣戈船下灘水更分樓
船浮豫章頗聞師出三鵠路盡是中屯六郡良漢南食麥

如食玉湖南驅人如驅羊營平請穀三百萬祁連引兵九
千里少府私錢不可知大農計歲今餘幾士兵番馬貔虎
同蝮虵毒草篁竹中未論芻粟捐金費直愁瘴癘連營空
我思荊州李太守欲募蠻夷令自攻至今民歌尹殺我州
郡擇人誠見功張喬祝良不難得誰借前飭開天聰詔書
哀痛言語切爲民一洗橫尸血摧鋒陷堅實萬戶塹山堙
谷窮三穴南平舊時頗臣順欲獻封疆請施節廟謀猶計
病中原豈知一朝更屠滅天道從來不爭勝功臣好爲可
喜悅交州雞肋安足貪漢開九郡勞臣監呂嘉不肯佩銀
印徵側持戈敵百男君不見往年瀕海未郡縣趙地閉關
能朝獻老翁竊帝聊自娛自頭抱孫思事漢孝文親遣勞

苦書稽首請去黃屋車得一亡十終不忍太宗之仁千古
無

答王道濟寺丞觀許道寧山水圖

往逢醉許在長安
蠻溪大硯磨松烟
忽呼絹素翻硯水
久不下筆或經年
異時踏門闖白首
巾冠欹斜更索酒
舉杯意氣欲翻盆
倒臥虛樽將八九
醉拈枯筆墨淋漓
浪勢若山崩不停
手數尺江山萬里
遙滿堂風物冷蕭
蕭山僧歸寺童子
後漁伯欲渡行人
招先君笑指溪上
宅鷗鷺白鷺如相
識許生再拜謝不
能元是天機非筆
力自言年少眼明
時手揮八幅錦江
絲贈行卷送張京
兆心知李成是我
師張公身逐銘旌
去流落不知今主
誰大梁畫肆閭水
墨我

君盤礴忘掛客蛛絲煤尾意昏昏幾年風動人家壁雨雪
淅淅滿寺庭四圍冷落讓丹青笑訓肆翁十萬錢卷付騎
奴市盡傾王丞來觀皆失席指點如見初畫日四時風物
入句圖信知君家有摩詰我持此圖二十年眼見綠髮皆
華顛許生縮手入黃泉衆史弄筆摩青天君家枯松出老
翟風煙枯枝倚崩石蠹穿風物君愛惜不誣方將有人識

過家

絡緯聲轉急出家寒不運兒時手種柳上與雪雨近舍旁
舊傭保少換老欲盡宰木鬱蒼蒼田園變畦畛招延屈父
黨勞問走婚親歸來翻作客顧影良自哂一生萍託水萬
事雪侵鬢夜聞風墮霜乾葉落成陣燈花何故喜大是報

書信親年齒喜懼兒齒欲毀齒繫船三百里去夢無一寸

答永新宗令寄石耳

飢欲食首山薇渴欲飲潁川水嘉禾令尹清如水寄我南山石上耳筠籠動浮烟雲姿淪湯磨沙光陸離竹萌粉耳相發揮芥薑作辛和味宜公庭退食飽下筯把菊避席遺萍虀雁門天花不復憶况乃桑鵝與楮雞小人藜羹亦易足嘉蔬遺餉荷眷私吾聞石耳之生常在蒼崖之絕壁苔衣食腴風日炙捫蘿挽葛採萬仞仄足委骨豺虎宅佩刀買犢劒買牛作民父母今得職閤仲叔不以口腹累安邑我其敢用鮭菜煩嘉禾願公不復甘此鼎免使射利登嵯

峨

分坑入前城

刀坑石如刀勞坑人馬勞窮窶篁竹陰是常三逋逃白狐
跳梁去豪猪生怒嗥黃雲覺日瘦木落知風饕輕軒息源
口飯羹煮溪毛山農驚長吏出拜家騷騷借問淡食民祖
孫甘餽糟賴官得鹽喫政苦無錢刀

乙卯宿清泉寺

稅輿陟高岡却立倚天壁就與亂清溪轉石飛霹靂十步
一沮洳五步一枳棘上方未言返豁見平土宅田家雞犬
歸佛廟檀藥碧蓮蕩落紅衣泉泓數白石人如安巢鳥稍
就一枝息鐘魚各知時吾亦自得力

丙辰仍宿清泉寺

山農居負山呼集來苦遲旣來授政役謠謠謂余欺按省
其家資可忍鞭挾之恩言諭公家疑阻久迺隨膝口終自
愧吾敢乏王師官寧憚淹畱職在捐婢娶所將部曲多潤
汝父老爲西山失半壁且復下囊輜啼鴉散篇帙休吏稅
巾衣石泉鼓坎坎竹風吹參差書冷行熠燿壁蟲催杼機
昏缸夜未央高枕夢登巖

金刀坑迎將家待追漿坑十餘戶山農不至因題其
壁

窮鄉阻地險篁竹嘯夔魑惡少擅三窟不承吏追呼老翁
燕無囚偃蹇坐里閭後生習聞見官不禁權輿懷書訴長
吏持杖磨公徒遂令五百里化爲豺豕墟古來沉牛羊檄

水臣鯉魚猛虎搏文章矧而民髮膚哀哉奉其身曾不如
鳥鳥破家縣令手南面天子除要能伐强梁然後活惇孤
屬爲民父母未教忍先誅山川甚秀拔人物亦詩書十室
有忠信此鄉何獨無

庚寅乙未猶泊大雷口

廣原暉終風發怒土囊口萬艘萍無根廼知積水厚龍鱗
火熒熒鞭笞雷霆走公私連檣休森如束春韭倚筇兼葭
灣垂楊欲生肘雄文酬江山惜無韓與柳五言呻吟內慚
愧陶謝手送菜煩鄰船買魚熟溪友兒童報晦冥正晝見
箕斗吾方廢書眠鼻鼾黽囊吼猶防盜窺家嚴鼓中夜守
泊城謝公墩牛渚蕩子婦何時快登臨篙師分牛酒

阻水泊舟竹山下

竹山蟲鳥朋友語討論陰晴怕風雨丁寧相教防禍機草
動塵驚忽飛去提壺歸去意甚真柳暗花濃亦半春北風
幾日銅官縣欲過五松無主人

贈別李端叔

我觀江南山如目不受垢憶食江南薇子獨於我厚在北
思江山如懷冰雪顏千峰上雲雨岑絕何由攀當時喜文
章各有兒子氣爾來領須自有兒能拜起讀書浩湖海解
意開春冰成山更崇堀顧我醜邱陵白玉著石中與物大
落落涇渭相將流世不名清濁乞言旣不易贈言良獨難
古來得道人挂舌屋壁間牧羊金華道載酒太元宅支頤

聽晤語願君喙三尺我行風雨夜船窗聞遠雞故人不可見故人心可知

曉放汴舟

秋聲滿山河行李在梁宋川塗事雞鳴身亦逐羣動霜清魚下流橘柚入包貢又持三十口去作江南夢

衝雪宿新寨忽忽不樂

照北縣南何日了又來新寨解征鞍山衝斗柄三星沒雪共月明千里寒小吏忽時須束帶故人頗問不休官江南長盡捎雲竹歸及春風斬釣竿

次韻裴仲謀同年

交蓋春風汝水邊客牀相對臥僧氊舞陽去葉纔百里賤

子與公俱少年白髮齊生如有種青山好去坐無錢煙沙
簞竹江南岸輸與鷓鴣取次眠

次韻蓋郎中率郭郎中休官

仕路風波雙白髮閒曹笑傲兩詩流故人相見自青眼漸
貴卽今多黑頭桃葉柳花明曉市荻芽蒲笋上春洲定知
聞徙休官去酒戶家園得自由

世態已更千變盡心源不受一塵侵青春白日無公事紫
燕黃鸝俱好音付與兒孫知伏臘聽教魚鳥逐飛沉黃公
壚下曾知味定是逃禪入少林

和陳君儀讀太真外傳

扶風喬木夏陰合斜谷鈴聲秋夜深人到愁來無處會不

關情處總傷心

梁州一曲當時事記得曾拈玉笛吹端正樓空春晝永小
桃猶學淡燕支

高麗條脫珮紅玉邏紗琵琶撚綠絲蛛網屋煤昏故物此
生唯有夢來時

戲答舍弟船場探春

雨餘禽語催天曉月上梨花放夜闌莫聽游人待妍暖十
分傾酒對春寒

呻吟齋睡起

槩儿坐清晝博山凝妙香蘭芽依客土柳色遘鄰牆巷僻
過從少官閒氣味長江南一枕夢高臥聽鳴榼

墻下蓬蒿地兒童課剪除
蔓蒿隨分種杞菊未須鉏
河水傳烽火交州報捷書
無能落閒處慙愧飽春蔬

和師厚郊居示里中諸君

籬邊黃菊關心事窗外青山不世情
江橘千頭供歲計秋蛙一部洗朝醒
歸鴻往燕競時節宿草新墳多友生
身後功名空自重眼前樽酒未宜輕

夜發分寧寄杜澗叟

陽關一曲水東流燈火旌陽一釣舟
我自只如常日醉滿川風月替人愁

上肅家峽

玉筍峰前幾百家山明松雪水明沙
超虛人集春蔬好桑

江西詩徵

卷九

宋五

天

茵竹萌煙蕨芽

出迎使客質明放船自瓦窰歸

鼓吹喧江雨不開丹楓落葉放船回風行水上如雲過地
近嶺南無雁來樓閣人家捲簾幕菰蒲鷗鳥樂灣洄惜無
陶謝揮斤手詩句縱橫付酒杯

登快閣

癡兒了却公家事快閣東西倚晚晴落木千山天遠大澄
江一道月分明朱弦已爲佳人絕青眼聊因美酒橫萬里
歸船弄長笛此心吾與白鷗盟

奉答李和甫代簡

山色江聲相與清卷簾待得月華生可憐一曲並船笛說

盡故人離別情

夢中往事隨心見醉裏繁華亂眼生長爲風流惱人病不
如天性總無情

長沙留別

折腳鐺中同淡粥曲腰桑下把離杯知君不是南遷客魑
魅無情須早回

漫尉

庭堅讀漫叟文愛其不從於役而人性物理齋然
詣於根理因戲作漫尉一篇簡舞陽尉裴仲謨兼
寄贈郝希孟胡深夫二同年爲我相與和而張之
尚使來者知居厚爲寡悔之府然知我罪我皆在

此詩

豫章黃魯直既拙又狂癡往在江湖南漁樵乃其師腰斧
入白雲揮車掉清溪虎豹不亂行鷗鳥相與嬉遇人不崖
異順物無瑕疵不知愛故厭不悔爲人欺晨朝常漫出莫
夜亦漫歸漫尉葉公城漫撫病餘黎不篡非已事不趨非
吾時人罵狂癡拙魯直更喜之或請陳漫尉壽尉蒲萄卮
酒行激懦氣攘袂起哨規君子守一官烏肯苟簡爲奈何
如秋葭信狂風離披漫行恐汙德漫止將敗機漫默買猜
謗漫言來詬譏漫尉謝答客願客深長思漫行無軌闕漫
止無馬機漫默怨者寡漫言知者希吾生漫叟後不參與
之齊於戲獨如子因使目爲眉強顏不計返乾坤一醯雞

崑崙視糟垤旣化不自知悔吝雖萬塗直道甚坦夷覆轍
索孤竹奔車求仲尼以旌招虞人賤者不肯尸玉潤安可
涸日光安可輜斯言出繫表當以周象窺賦分有自然那
用時世移吾漫誠難改盡醉不敢辭

將歸葉光寄明復季常

初日照屋山好鳥哢簷角卷簾吏却掃齋舍寒蕭索呼兒
芻春醪期與夫子酌簡書驅我出衝雪凍兩脚莫行星輝
輝曉起雞喔喔青煙過空村商旅無遠槩豈不欲少留王
事苦敦薄平生白眼人今日折腰諾可憐五斗米奪我一
溪樂公等何逍遙睥睨寄講學談犀振清風碁局落秋雹
雲陰愁濛鴻山路險犖确慎無告歸軒使我數日惡羸驂

逆歸心旋凜蹶霜凜悲嘶情鄣泥短簫冷難提南征喜氣
動迎面蛛絲落買網膾金橙歸償炊黍約

新寒餞南歸

初更月蝕缺半壁三更北風雪平屋夜寒置酒送歸客長
歌燕雁燈前落故園無書已十月目極千里雲水隔客方
有行乃未已歸且經予江上宅比鄰諸老應相問爲道於
今不如昔新知翻手覆手問故人江南與江北有時日高
天氣清炙背南軒把書策可憐斯人巧言語今已埋沒黃
土陌乃知生前傾意氣不用身後書竹帛往在江南最少
年萬事過眼如鳥翼夜行南山看射虎失脚墜入崖底黑
却攀荆棘上平田何曾悔念身可惜辭家上馬不反顧談

笑據鞍似無敵邇來多病足憂虞平地進寸退數尺意氣
索然成老翁所有髣髴猶未白閑居爲婦執薪爨宿處野
人爭臥席昔壯今衰殆不如吾恐未必不爲福寄聲諸老
喜自愛客行努力更強食門前種柳今幾長戒兒勿令打
鷓鴣不免歸來躑躅間爲公置酒臨江閣

秋懷二首

秋陰細細壓茅堂吟蟲啾啾昨夜涼雨開芭蕉新間舊風
撼簷簷官應商砧聲已急不可緩簷景旣短難爲長狐裘
斷縫棄墻角豈念晏歲多繁霜

茅堂索索秋風動行繞空庭紫苔滑蛙號池上晚來雨鵲
轉南枝夜深月翻手覆手不可期一死一生交道絕湖水

無端浸白雲故人書斷孤鴻沒

春近四絕句

閑後陽和臘裏回濛濛小雨暗樓臺柳條榆莢弄顏色便
恐入簾雙燕來

亭臺經雨壓塵沙春近登臨意氣佳更喜輕寒勒成雪未
春先放一城花

小雪晴沙不作泥疎簾紅日弄朝暉年華已伴梅梢晚春
色先從草際歸

梅英欲盡香無賴草色才蘇綠未勻苦竹空將歲寒節又
隨官柳到青春

題雙鳬觀

飄蕭闕世等虛舟歎息眼前無此流滿地悲風盤翠竹半
叢寒日破紅榴青山空在衣冠古白鶴不歸宮殿秋王令
平生樽酒地千年萬歲想來遊

客自潭州來稱明因寺僧作靜照堂求予作

客從潭府渡河梁籍甚傳誇靜照堂正苦窮年對塵土坐
令合眼夢湖湘市門曉日魚蝦白鄰舍秋風橘柚黃去馬
來舟爭歲月老僧元不下胡牀

喜念四念八至京

朔雲蕭蕭映薄幃夢回空覺淚痕稀驚聞庭樹烏鳥樂知
我江湖鴻雁歸拂榻喜開姜季被上堂先着老萊衣酒樽
烟火長相近酬勸從今更不違